



REPUBLIKA E SHQIPËRISË

KOMISIONERI PËR MBROJTJEN NGA DISKRIMINIMI

Nr. Prot.

Tiranë, më _____._____.2026

V E N D I M

Nr. _____, Datë _____, 2026

Bazuar në nenin 32/1/b dhe nenin 33 të Ligjit nr. 10221, datë 04.02.2010 “*Për Mbrojtjen nga Diskriminimi*”, të ndryshuar¹, Komisioneri për Mbrojtjen nga Diskriminimi², mori në shqyrtim ankesën nr. 263, datë 12.11.2025, të paraqitur nga Fondacioni Së Bashku, përfaqësuar nga znj.S.L, Drejtore Ekzekutive kundër Shoqërisë XHENIS-SH sh.p.k, me Nipt xxxxxxxx ku pretendohet diskriminim i personave me aftësi të kufizuara për shkak të mungesës së aksesueshmërisë në ndërtesën e Grand Hotel Europa, Shkodër. Gjatë shqyrtimit të ankesës, Komisioneri për Mbrojtjen nga Diskriminimi,

K O N S T A T O N:

I. Parashtrimi i fakteve sipas subjektit ankues.

Në ankesën e paraqitur pranë Komisionerit, pala ankuese parashtron se, në ndërtesën e Grand Hotel Europa, Shkodër, mungojnë elementët e aksesueshmërisë për personat me aftësi të kufizuara, si më poshtë:

- Nuk ka vende parkimi të rezervuara për personat me aftësi të kufizuara.
- Ka një rampë në hyrje, por është shumë e pjerrët dhe e ngushtë, gjë që është shumë e rrezikshme për tu përdorur. Nuk është e përdorshme edhe nëse do të doje sepse nuk përputhet me asnjë standard. Në anë, ka një rampë tjetër, por nuk gjendet lehtë dhe për më tepër nuk ka parmakë dhe e kanë mbyllur derën dhe kanë vendosur tavolina, në anën ku duhet të përdoret rampa. Pra, është jashtë funksionit.
- Trotualet nuk janë të aksesueshme për personat me aftësi të kufizuara.
- Nuk ka elementë aksesueshmërie për personat me aftësi të kufizuara.

Përfundimisht pala ankuese kërkon nga Komisioneri konstatimin e diskriminimit dhe përmirësimin e situatës në mënyrë që të jetë e aksesueshme për komunitetin dhe për personat me aftësi të kufizuara.

¹ Në vijim referuar me LMD.

² Në vijim referuar me Komisioneri.

II. Procedura e ndjekur nga Komisioneri

Komisioneri mori në shqyrtim ankesën bazuar në kompetencën e parashikuar nga neni 32, pika 1, gërma “b”, të ligjit nr. 10221/2010 “Për Mbrojtjen nga Diskriminimi”, të ndryshuar, që i jep të drejtën për të shqyrtuar ankesat e paraqitura nga organizatat që kanë një interes të ligjshëm, për çështje që lidhen me interesa kolektive. Konkretisht në këtë dispozitë sanksionohet sa vijon: “1. Komisioneri ka kompetencë: ... b) të shqyrtojë ankesat nga organizatat që kanë një interes të ligjshëm për të vepruar në emër dhe me pëlqimin me shkrim të individëve ose grupeve të individëve që pretendojnë se ka ndodhur diskriminimi ose në emër të tyre për çështje që lidhen me interesa kolektive;”

Ankesa e paraqitur është në përputhje me kërkesat e nenit 33, pika 3, të LMD-së dhe u pranua për shqyrtim, pasi nuk ekziston asnjë nga shkaqet për mospranim të përcaktuara nga neni 33, pika 4, të LMD. Në zbatim të parashikimeve ligjore, të neneve 32 dhe 33, të ligjit nr. 10 221/2010 “Për Mbrojtjen nga Diskriminimi”, Komisioneri për Mbrojtjen nga Diskriminimi ka ndërmarrë hapat si më poshtë:

1. Me shkresën me nr. 1592/1 prot., datë 03.12.2025, Komisioneri ka kërkuar informacion dhe dokumentacion në lidhje me çështjen nga shoqëria “XHENIS-SH” sh.p.k (Grand Hotel Europa, Shkodër) në cilësinë e subjektit kundër të cilit është paraqitur ankesa. Konkretisht subjektit i është kërkuar:
 - Kopje të ekstraktit të regjistrimit në Qendrën Kombëtare të Biznesit;
 - Sa është numri total i vendeve të parkimit dhe sa prej tyre janë të rezervuara për personat me aftësi të kufizuara?
 - Informacion dhe kopje të dokumentacionit ligjor dhe teknik mbi përmbushjen e standardeve dhe kriterëve sipas parashikimeve ligjore në fuqi, që lidhen me aksesueshmërinë për personat me aftësi të kufizuara, në lidhje me rampën/rampat, trotualet dhe elementët e aksesueshmërisë për personat me aftësi të kufizuara në shikim.
 - Çdo informacion tjetër që ju do e gjykoni të arsyeshëm se do të ndihmonte në sqarimin e plotë të kësaj çështjeje.

Rezulton se subjekti ka marrë dijeni për këtë shkresë, fakt ky që rezulton i provuar nga lajmërim marrja e shërbimit postar Nr. RR807658496AA administruar në dosje, por nuk ka kthyer përgjigje.

2. Me shkresën nr. 15 prot., datë 05.01.2026, Komisioneri i është drejtuar sërish subjektit me një kërkesë të përsëritur për informacion dhe dokumentacion në lidhje me çështjen.

Në shkresën e sipërpërmendur, Komisioneri i bën kujtesë subjektit, për të dërguar informacionin dhe dokumentacionin e kërkuar brenda 5 (pesë) ditëve, duke i sjellë në vëmendjen se mosplotësimi i kësaj kërkeje, përbën shkelje të dispozitave të LMD-së.

Subjekti ka marrë dijeni për shkresën nr. 15 prot., datë 05.01.2026, më datën 06.01.2026, fakt ky që rezultoi i provuar nga lajmërimi marrja e shërbimit postar me Nr. RR805015998AA, por nuk ka kthyer përgjigje.

3. Bazuar në nenin 33, pika 8, të ligjit nr. 10 221, datë 04.02.2010 *“Për Mbrojtjen nga Diskriminimi”*, të ndryshuar, ku parashikohet se: *“ 8. Kur e sheh të përshtatshme, komisioneri zhvillon një seancë dëgjimore publike dhe fton palët dhe çdo person tjetër të interesuar.”* për shqyrtimin e mëtejshëm të çështjes, me shkresën nr. 220 prot, datë 27.01.2026, Komisioneri njoftoi palët për zhvillimin e një seancë dëgjimore publike në datën 18.02.2026.

Shoqëria “XHENIS-SH” sh.p.k (Grand Hotel Europa, Shkodër) nuk u paraqit në seancë dëgjimore dhe nuk depozitoi informacionin e nevojshëm për shqyrtimin e ankesës, të kërkuar zyrtarisht nga Komisioneri.

III. Pas kryerjes së hapave të mësipërm proceduralë, Komisioneri çmon se:

Shoqëria “XHENIS-SH” sh.p.k (Grand Hotel Europa, Shkodër) si subjekt kundër të cilit është paraqitur ankesa nr. 263, datë 12.11.2025, që i përket palës ankuese Fondacioni Së Bashku , me dijeninë e plotë nuk ka mbështetur Komisionerin në ushtrimin e kompetencës së tij ligjore për të shqyrtuar ankesat për diskriminim, të përcaktuar në nenin 32/1/b, të LMD-së duke mos dhënë informacionin dhe dokumentacionin e kërkuar.

Duke mos dhënë informacionin dhe dokumentacionin e kërkuar nga Komisioneri, Shoqëria “XHENIS-SH” sh.p.k (Grand Hotel Europa, Shkodër) nuk ka përmbushur detyrimin ligjor të parashikuar nga neni 32/2, të LMD-së, sipas të cilit: *“2. Të gjitha institucionet publike dhe subjektet private janë të detyruara të mbështesin Komisionerin, duke i dhënë informacionin që i nevojitet dhe duke i garantuar aksesin në informacion në përmbushjen e detyrave të tij.”* Ky mosveprim, kjo mospërmbushje e këtij detyrimi ligjor, në bazë të nenit 33/13, të LMD-së shoqërohet me marrjen e masës administrative, gjobë.

Për sa më sipër, Komisioneri për Mbrojtjen nga Diskriminimi arrin në konkluzionin se, Shoqëria “XHENIS-SH” sh.p.k (Grand Hotel Europa, Shkodër), është në shkelje të detyrimit ligjor të përcaktuar në nenin 32/2, të LMD-së, shkelje e cila sipas nenit 33/13, të po këtij ligji, është e dënueshme me gjobë.

Për personat juridik, siç është në rastin konkret është Shoqëria “XHENIS-SH” sh.p.k (Grand Hotel Europa, Shkodër), neni 33, pika 13, të LMD-së, përcakton shkrehimisht: *“Çdo person që shkel dispozitat e këtij ligji dënohet me gjobë si më poshtë”:..... b) personi juridik nga 60.000 deri në 600.000 lekë;.....”*

Në lidhje me përcaktimin e masës së gjobës, Komisioneri mban në konsideratë parashikimet dhe kriteret e vendosura në nenin 33, pika 12, të LMD-së, ku sanksionohet se: *“12. Kur vendos masën,*

komisioneri siguron që ajo të jetë: a) e efektshme dhe parandaluese; dhe b) në përpjesëtim me gjendjen që e shkaktoi vendosjen e masës. Nëse vendoset gjobë, komisioneri përcakton shumën e gjobës duke marrë parasysh: i) natyrën dhe fushën e veprimit të shkeljes dhe ndikimin mbi viktimën; dhe ii) rrethanat personale e financiare të shkelësit, veçanërisht duke marrë në konsideratë të gjitha burimet e të ardhurave dhe nëse shkelja kryhet nga një person juridik privat, merren parasysh aktivet e bilancit dhe fitimi, si dhe pagat totale të paguara punonjësve; c) nëse e njëjta shkelje diskriminon disa persona, vendoset vetëm një gjobë, por duke marrë parasysh kërkesat e shkronjës “b” të këtij neni.”

Duke mbajtur në konsideratë kriteret e mësipërme për përcaktimin e masës së gjobës dhe bazuar në faktin që, e drejta e pretenduar nga pala ankuese, sikurse është e drejta për aksesueshmëri për personat me aftësi të kufizuara, është një parakusht për gëzimin në baza të barabarta me të tjerët të të drejtave dhe lirive nga ana e personave me aftësi të kufizuara, Komisioneri, arrin në përfundimin se, Shoqëria “XHENIS-SH” sh.p.k (Grand Hotel Europa, Shkodër) duhet të gjobitet me 100.000 (njëqind mijë) lekë, për mosdhënien e informacionit të kërkuar zyrtarisht nga Komisioneri për Mbrojtjen nga Diskriminimi.

PËR KËTO ARSYE:

Bazuar në nenin 32, pika 1, gërma “ç” dhe pika 2, nenin 33, pikat 11, 12, 13 e 14, 18, të ligjit nr. 10221, datë 04.02.2010 “Për Mbrojtjen nga Diskriminimi”, të ndryshuar, Komisioneri për Mbrojtjen nga Diskriminimi,

V E N D O S I :

1. Shoqëria “XHENIS-SH” sh.p.k (Grand Hotel Europa, Shkodër), me Nipt xxxxxxxx të gjobitet në vlerën 100.000 (njëqind mijë) lekë, për mosdhënien e informacionit të kërkuar zyrtarisht nga Komisioneri për Mbrojtjen nga Diskriminimi, në kuadër të shqyrtimit të ankesës nr.263, datë 12.11.2025.
2. Gjoka të derdhet në Buxhetin e Shtetit brenda një muaji nga marrja dijani, mbi masën administrative. Paga e kësaj vlere të bëhet pranë çdo banke në llogarinë e thesarit Tiranë, për llogari të: Komisioneri për Mbrojtjen nga Diskriminimi, NIPT: L02027451K, Kodi: 1091001, Entiteti i Qeverisjes: 001, Distrikti (TDO) 3535, Llogaria ekonomike: 7115499.
3. Dërgimi i informacionit të kërkuar, brenda 7 (shtatë) ditëve nga marrja dijani e këtij vendimi, sjell shfuqizimin e gjobës.
4. Kundër këtij vendimi lejohet ankim në Gjykatën Administrative të Shkallës së Parë Tiranë, brenda 45 ditëve nga marrja dijani.

KOMISIONERI

Robert GAJDA